

Morning Dogri (NSD) National News Bulletin 27-03-2025

आकाशवाणी

1. कोला मंत्रालय आसेआ अज्ज नमीं दिल्ली च कारोबारी कोला खदानें दी नीलामी दा 12मां दौर शुरु कीता जाहग।
2. राश्ट्री महिला आयोग नै आखेआ ऐ जे ओह देसै दे हर इक जिले च ब्याह-शादी शा पैहले आहले सलाह-मशवरे मतल्लक केन्द्र खोलग।
3. बिहार च इस ब'रे होने आहले असैम्बली चुनाएं शा पैहले राज्य दे एनडीए नेताएं नमीं दिल्ली च बैठका कीती।
4. विदेश मंत्री सुब्रह्मण्यम जयशंकर होरें आखेआ ऐ जे भारत ते चीन ब'रे 2020 च गलवान घाटी च होई दिएं झड़फे करी खराब होए दे सरबंघें गी सुधारने दी कोशश करै करदे न।
5. भारती मौसम विभाग नै अज्ज जम्मू-कश्मीर च भारी बरखा बरने ते उच्चिएं धारे पर बर्फबारी दे असार जताए न।
6. खेलो इंडिया पैरा गेम्स 2025 दा समापन अज्ज सं'झां इक भव्य समारोह दे कन्नै होग।

<><><><><><><>

Coal Mine Auction

कोला मंत्रालय अज्ज नमीं दिल्ली च वाणिज्यिक कोला खदान दी नीलामी दे 12में दौर दी शुरुआत करोग। प्रस्तावित खानें बिच्चा 13 कोला खानें दा पूरी चाल्ली कन्नै पता लाया गेआ ऐ जिसलै जे 12 खानें दी आंशिक तौरा पर खोज कीती गई ऐ। नीलामी दा मकसद घरेलू ते अंतर्राष्ट्रीय निवेशकें गी आकर्षित करना ऐ, जेह्दे कन्नै ऊर्जा ते औद्योगिक विकास च आत्मनिर्भरता दे आस्तै भारत दी प्रतिबद्धता गी मजबूत कीता जाई सकै।

<><><><><><><>

NCW

राश्ट्री महिला आयोग नै आखेआ ऐ जे ओह देसै दे हर इक जिले च ब्याह-शादी शा पैहले आहले सलाह-मशवरे मतल्लक केन्द्र खोलग। इस सरबंघै च पटना च मीडिया कन्नै गल्ल करदे होई आयोग दिएं अध्यक्ष विजया रहाटकर होरें आखेआ जे एह आयोग दी इक नमीं पैहलकदमी ऐ, जिसी इस ब'रे अंतर्राष्ट्री महिला दिवस दे मौके उपपर रम्भेआ गेआ ऐ। उ'ने

दस्सेआ जे देसै दे 11एं राज्यें च अजें तोहड़ी ऐसे 23 केन्द्र खोली दित्ते गेदे न। उ'ने गलाया जे इ'ने केन्द्रे गी सरकारी इमारतें च खोलेआ जा'रदा ऐ ते एह जिला जां मुंसिपल इदारे दी निगरानी हेठ कम्म करडन। श्रीमती रहाटकर होरें इब्बी दस्सेआ जे इ'ने केन्द्रे दा लाह ओकड़े जोड़ें गी थ्होग जि'दा तौले गै ब्याह होने आह्ला ऐ। उ'ने गलाया जे एह केन्द्र समाजी मनोविज्ञान ते ब्याह दे बवहासिक पैहलुएं सरबंधी मदाद उपलब्ध करोआडन। उ'ने गलाया जे ब्याहें दा त्रुटटना ते संयुक्त परोआरें दा घटना चैंता दा विशे ऐ।

<><><><><><>

Nadda-LJP

बिहार दे राश्ट्री जनतांत्रिक गठबंधन दे नेताएं कल नमीं दिल्ली च बीजेपी दे सांसद संजय जयसवाल दे आवास पर इक बैठक कीती। बीजेपी अध्यक्ष जगत प्रकाश नड्डा होरें राज्य दे वरिष्ठ बीजेपी नेताएं दे कन्नो कन्नी जनता दल यूनाइटेड, लोक जनशक्ति पार्टी(राम विलास), हिंदुस्तान अवाम मोर्चा सैक्युलर ते राश्ट्री लोक मोर्चा दे वरिष्ठ नेताएं ते बिहार दे एनडीए सांसदें बैठक च हिस्सा लैता। इस ब'रे दे खीरै च होने आले बिहार विधानसभा चुनाएं शा पैहले इक बैठक दा मकसद राज्य च गठजोड़ आले भागीदारें दे बिच्च तालमेल गी बधाना ऐ। एहदे शा पैहले केन्द्र मंत्री चिराग पासवान होरें आखेआ जे नेताएं बैठक दे दरान बिहार च औने आले विधानसभा चुनाएं आस्तै रणनीतिएं पर चर्चा कीती। बैठक च हिस्सा लैने आले केन्द्री मंत्रिण च बीजेपी दे गिरिराज सिंह, जनता दल यूनाइटेड दे राजीव रंजन सिंह, हिंदुस्तान अवाम मोर्चा दे केन्द्री मंत्री जितन राम मांझी ते राश्ट्री लोक मोर्चा दे उपेन्द्र कुशवाहा होर शामिल हे।

<><><><><><>

Banking Laws Parl.

संसद नै बैंकिंग कानून संशोधन बिल 2024 पास करी दित्ता ऐ। इसी जंदे रोज राज्यसभा थमां मंजूरी थ्होई गई। लोकसभा पैहले गै इस बिल गी पास करी चुकी दी ऐ। इस बिल च भारती रिजर्व बैंक कानून 1934, बैंकिंग विनियमन कानून 1949, भारती स्टेट बैंक कानून 1955, बैंकिंग कंपनियें सरबंधी कानून 1970 ते बैंकिंग कंपनियें सरबंधी उपक्रमें दे अधिग्रहण ते मुंतकिली मतल्लक कानून 1980 च तरमीम करने दे प्रावधान न। इस बिल दा मकसद बैंक खाते च नामांकित व्यक्तियें लेई मजूदा विकल्पें दी गिनतरी इक्क थमां बधाइयै चार करना ऐ। एह बिल बैंकें गी अपने लेखा परीक्षकें दे मेहनताने गी तय करने दा हक दि'दा ऐ। केन्द्री

वित्त मंत्री निर्मला सीतारामन होरें इस सरबंधै च जारी चर्चा दा परता दिंदे होई आखेआ जे सरकार नै देशै च बैंकिंग खेत्तर गी मजबूत करने आस्तै केई सुधार कीते न। उ'नें आखेआ जे ब'रे 2014 च बैंक दबाऽ हेठ हे ते नरेंद्र मोदी सरकार दे सत्ता च औने पर इक मजबूत बैंकिंग प्रणाली ढांचा तैयार कीता गेआ, जेह्दे'नै बैंकें दी माली हालत मजबूत होई ऐ। वित्त मंत्री होरें आखेआ जे सार्वजनिक खेत्तर दे बैंकें पिछले ब'रे 1 लक्ख 41 ज्हार करोड़ रुपें दा हूनै तगर दा सभ्बनं शा मता शुद्ध लाह हासल कीता ऐ। उ'नें इब्बी आखेआ जे सरकार नै माली समावेशन गी होर मजबूत कीता ऐ जे बैंकिंग गी समाज दे हर इक माहनुयै तोहड़ी पुजाने दा कम्म कीता ऐ जेह्दे कन्नै सभ्बनं नागरिक दी पुज्ज बैंकिंग सेवां तगर पुज्जना जकीनी बनेआ ऐ। उ'नें दस्सेआ जे अजें तगर 55 करोड़ शा मते जन-धन खाते खोले जाई चुके दे न ते उंदे चा 55 फीसद शा मते खाते महिलाएं दे न।

<><><><><><>

India China

विदेश मंत्री सुब्रह्मण्यम जयशंकर होरें आखेआ ऐ जे भारत ते चीन ब'रे 2020 च गलवान घाटी च होई दिएं झड़प्फें करी खराब होए दे सरबंधें गी सुधारने कोशश करै करदे न। उ'नें आखेआ जे सरबंधें च तनोतनी कन्नै कुसै बी पक्ख गी लाह नेई होग। डॉक्टर जयशंकर होरें आखेआ जे मतभेद, विवाद नेई बनने चाईदे ते मुकाबलेबाजी, संघर्ष नेई बननी चाईदी। उ'नें नमीं दिल्ली च कल एशिया सोसाइटी दे अध्यक्ष ते मुख्ख कार्यकारी अधिकारी क्युंग-व्हा कांग हुंदे कन्नै भारत-चीन सरबंधें पर गल्लबात च एह गल्ल आखी। डॉक्टर जयशंकर होरें आखेआ जे पिछले ब'रे अक्तूबर थमां दौनें मुख्खें बश्कार सरबंधें च किश सुधार होआ ऐ ते दौनें मुख्ख, अपने सरबंधें दे बक्ख-बक्ख पैहलुएं पर कम्म करै करदे न। उ'नें आखेआ जे भारत ते चीन दौनें अपने सरबंधें गी परतियै सुधारने दे जतन करै करदे न। विदेश मंत्री होरें इब्बी आखेआ जे दौनें मुख्ख, केई मुद्दें पर मुकाबलेबाजी करदे न, पर एह्दा मतलब दौनें मुख्खें बश्कार संघर्ष नेई होना लोड़चदा। उ'नें अमरीका दे रौंऽ च बदलाव ते चीन दे उदय दे कन्नै बुनियादी बदलाव आहली बक्खी बी सारत कीती।

<><><><><><>

S. Jaishankar US Trade

विदेश मंत्री सुब्रह्मण्यम जयशंकर होरें आखेआ ऐ जे भारत ते अमरीका बपार पर बड़े मते सक्रिय होइयै गैह्राई कन्नै चर्चा करै करदे न। उ'नें आखेआ जे अमरीका दे कन्नै अपने

ऊर्जा सरबंधें गी बधाने ते स्थिर ते उचित ऊर्जा वातावरण जकीनी बनाने पर बी भारत बचार करै करदा ऐ। उ'नें आखेआ जे भारत दे दूरगामी विकास ते बाददे लेई एह चर्चा महत्वपूर्ण ऐ। नमीं दिल्ली च कल एशिया सोसाइटी आसेआ आयोजित इक संवाद कार्यक्रम च डॉक्टर एस. जयशंकर होरें आखेआ जे बपार पर दौनें पक्खें बश्कार खुल्ली चर्चा होई ऐ जेहड़ी प्रधानमंत्री नरेंद्र मोदी ते अमरीका दे राष्ट्रपति डॉनल्ड ट्रम्प हुंदे आसेआ इस ब'रे दपक्खी बपार समझौता करने दे फैसले दा नतीजा ऐ। दक्खनी ते मध्य एशिया लेई अमरीका दे सहायक बपार प्रतिनिधि ब्रेंडन लिंच मंगलवार थमां भारत दी 5एं दिनें दी जात्तरा पर न। अमरीका दे कन्नै रणनीतिक सरबंधें पर, डॉक्टर जयशंकर होरें आखेआ जे ट्रम्प प्रशासन दे तैहत्त दौनें देशें दे रक्षा सरबंधें च मय्यारी बाददा होग। विदेश मंत्री होरें यूरोपी संघ ते बरतानिया दे कन्नै मुक्त बपार समझौतें लेई चलै करदी चर्चाएं दे बारै च बी गल्ल कीती।

<><><><><><>

DRDO VLSRSAM

रक्षा अनुसंधान ते विकास संगठन – डीआरडीओ ते भारती नौसेना नै जंदे रोज ओडिशा दे चांदीपुर च संगठित परीक्षण रेंज थमां स्वदेशी तौर पर विकसित वर्टिकल-लॉन्च शॉर्ट-रेंज सरफेस-टू-एयर मिसाइल का कामयाब परीक्षण कीता। एह आजमाईश जिमीं पर टिकाए गेदे इक वर्टिकल लॉन्चर थमां बड़ी गै नेड़मी रेंज ते घट्ट ऊँचाई पर इक उच्ची रफतार आहले ब्हाई लक्ष्य गी निशाना बनाइयै कीती गई। इस आजघमाईश नै मिसाइल प्रणाली दी घट्ट दूरी पर जिमीं थमां ब्हाउ च घट्ट उंचाई पर मार करने दी समर्थ गी स्थापित कीता ऐ।

<><><><><><>

IMD Weather

मौसम विभाग नै अज्ज जम्मू-कश्मीर च तेज बरखा बरने ते उच्चिएं धारें पर बर्फबारी दे असार जताए न। हिमाचल प्रदेश, उत्तराखंड ते पंजाब दे किश इलाकें च अज्ज गरज-चमक दे कन्नै तेज बरखा बरी सकदी ऐ। लद्दाख, गिलगित-बाल्टीस्तान-मुजफ्फराबाद, केरल, माहे, तमिलनाडु, पुदुचेरी ते कराईकल च बी अज्ज हौली थमां दरम्याने दर्जे दी बरखा दी मेद ऐ। अगले द'ऊं दिनें दरान अरुणाचल प्रदेश च बी तेज बरखा दा अंदाजा ऐ। मौसम वैज्ञानिक डॉ. सोमा सेन रॉय होरें दस्सेआ ऐ जे अगले त्रै दिनें च तमिलनाडु, पुदुचेरी, आंध्र प्रदेश दे समुंदरी कंडे आहले इलाकें ते यनम दे बक्ख-बक्ख हिस्सें च मौसम गर्म ते उमस भरोचा रौहग। विभाग नै अगले द'ऊं दिनें दरान देशै दे उत्तर-पच्छमी हिस्सें दे मैदानी इलाकें च

बद्धोबद्ध तापमान च बल्ले-बल्ले 2 शा 3 डिग्री सेल्सियस दे बाददा दा अंदाजा जताया ऐ। एह्दे परैन्त 3 थमां 5 डिग्री सेल्सियस दी गिरावट होई सकदी ऐ। उत्थे गै, शनिवारें ते ऐतवारें ओडिशा च लू चलने दी शेंका ऐ।

<><><><><><>

Khelo India

खेलो इंडिया पैरा गेम्स 2025 दा समापन अज्ज संजा'लै भव्य समारोह् कन्नै होग। एह्दा सरिस्ता भारतीय खेल प्राधिकरण करोग जेह्दे च युवा कम्मकाज ते खेड्डें दी राज्य मंत्री रक्षा निखिल खडसे बी शामिल होंगन। खेलो इंडिया मिशन दे तैह्त्त मुख् पैह्ला दे रूपै च पैरा गेम्स नै प्रतिभाशाली खडारिएं गी उच्ची सतह् पर अपने कौशल दा प्रदर्शन करने दा महत्वपूर्ण मंच प्रदान कीता ऐ। 8एं दिनें दी इस चैंपियनशिप च तीरंदाजी एथलेटिक्स, बैडमिंटन, पॉवरलिफ्टिंग, नशानेबाजी ते टेबल टेनिस जनेइएं 6 खेड्डें च 1 जहार 3 शा मते पैरा खडारिएं हिस्सा लैता।

<><><><><><>

IPL

आईपीएल टी-20 क्रिकेट च कल रातीं गुवाहाटी च कोलकोता नाईट राईडर्स नै राजस्थान रॉयल्स गी 8एं विकेटें कन्नै हराई दित्ता। कोलकोता नाईट राईडर्स नै 17.3 ओवरें च 2 विकेटां मुहाइयै 153 रंज बनाइयै 152 रंज दा लक्ष्य हासल करी लैता। एह्दे शा पैह्ले बल्लेबाजी करने आस्तै उत्तरी दी राजस्थान रॉयल्स नै तैह् 20एं ओवरें च 9 विकेटां मुहाइयै 151 रंज बनाए हे। कोलकाता नाईट राईडर्स नै टॉस जित्तियै पैह्ले गेंदबाजी दा फैसला कीता हा। अज्ज संजा साढ़े 7 बजे सनाराईजर्स हैदराबाद दा मकाबला हैदराबाद च लखनऊ सुपर जायंट्स कन्नै होग।

<><><><><><>

MCA PM IS

पिच्छले सत्रें दिएं कामयाबिएं दे क्रम गी अग्ले बधांदे होई प्रधानमंत्री इंटरनशिप योजना लेई अज्ज कॉरपोरेट कार्य मंत्रालय, मेदवारें गितै वर्चुअल ओपन हाउस आयोजित करग। आपसी गल्लबात पर आधारित इस आयोजन च आवेदकें दे जटिल सोआलें कन्नै जुड़ी दी अनमुल्ली

जानकारी ते परते प्रदान कीते जाडन। मंत्रालय दे वरिष्ठ अधिकारी, नीति ते प्रक्रिया सरबंधी विषयें पर परियोजना प्रबंधन टीम ते तकनीकी माहिरें दा पैनल, आवेदकें दे सोआलें दे परते देग। हफ्ते-हफ्ते आयोजित होने आहले एह ओपन हाउस, आवेदन प्रक्रिया च हिस्सा लैने आहले मेदवारें लेई इक महत्वपूर्ण पैहलकदमी दे रूपै च कम्म करदे न।

<><><><><><>